



Na osnovu člana 17. stav (1) tačke 17. i 22., a u vezi sa članom 19. Zakona o Visokom sudskom i tužilačkom vijeću Bosne i Hercegovine („Službeni glasnik BiH“ br. 25/04, 93/05, 48/07 i 15/08), člana 4. stav (2) i člana 6. stav (6) Pravilnika o orijentacionim mjerilima za rad tužilaca u tužilaštvima u BiH („Službeni glasnik BiH“ br. 64/16, 96/16, 93/17, 71/18 i 33/19) i člana 7. Uputstva za primjenu Pravilnika o orijentacionim mjerilima za rad tužilaca u tužilaštvima u Bosni i Hercegovini broj 13-02-2-2132-3/2016 od 18.10.2016. godine i broj 13-02-2-2813/2018 od 05.09.2018. godine, Visoko sudsko i tužilačko vijeće Bosne i Hercegovine, d o n o s i

S M J E R N I C E **za izradu godišnjeg izvještaja o radu tužilaštava** **- Prečišćen tekst - ¹**

Smjernice za izradu godišnjeg izvještaja o radu tužilaštava predstavljaju uputstvo za izradu izvještaja Tužilaštva BiH, Tužilaštva Brčko distrikta, kantonalnih i okružnih javnih tužilaštava te objedinjenog izvještaja o radu tužilaštava koji sačinjavaju statistički podaci, narativni izvještaj o radu i izvještaj o realizaciji strateških ciljeva predviđenih strateškim godišnjim planom tužilaštava, a koji su Tužilaštvo BiH, Tužilaštvo Brčko distrikta, entitetska, kantonalna i okružna javna tužilaštva obavezna dostaviti nadležnim organima.

Kantonalna i okružna javna tužilaštva su u obavezi da Visokom sudskom i tužilačkom vijeću Bosne i Hercegovine (u daljem tekstu: „VSTV BiH“) i nadležnim entitetskim tužilaštvima dostave plan rada za tekuću godinu i izvještaj o radu za prethodnu godinu najkasnije do 15. februara tekuće godine.

Glavni federalni i glavni republički tužilac su obavezni objediniti izvještaje o radu za prethodnu godinu (u skladu sa Smjernicama za izradu godišnjeg izvještaja o radu tužilaštava) i dostaviti VSTV BiH najkasnije do kraja februara tekuće godine.

Tužilaštvo BiH i Tužilaštvo Brčko distrikta su u obavezi da VSTV-u BiH dostave godišnji plan rada i izvještaj o radu za prethodnu godinu najkasnije do 15. februara tekuće godine.

➤ **PRVI DIO - Izvještaj o radu tužilaštva**

Izvještaj treba da obuhvati podatke i njihovu analizu za slijedeće segmente rada tužilaštva:

1. Unutrašnja organizacija i kadrovska osposobljenost tužilaštva (organizacija odjela i odsjeka, broj tužilaca po odjelima i odsjecima, sistematizacija i popunjenost tužilaštva, odsustva tužilaca, materijalni status tužilaštva);
2. Ostvarenje norme (ostvorena kolektivna norma tužilaštva, ostvorena kolektivna norma po odjelima i odsjecima, obrazloženje ostvarenja kolektivne norme manje od 100%, obrazloženje razloga ostvarenja pojedinačne norme tužilaca koja je manja od 100%);

¹ Ovaj prečišćeni tekst obuhvata:

- Smjernice za izradu godišnjeg izvještaja o radu tužilaštava usvojene na sjednici VSTV BiH održanoj 16.11.2017. godine (broj 13-02-3-3611-1/2017);
- Izmjene Smjernice, koje se odnose na izmjenu roka za dostavu izvještaja o radu sa 01. februara na 15. februar, usvojene na sjednici VSTV BiH održanoj 08. i 09.11.2018. godine;
- Dopunu Smjernica, koje se odnose na dodavanje nove tačke 13. u dijelu PRVI DIO – Izvještaj o radu tužilaštva, usvojenu na sjednici VSTV BiH održanoj 10. i 11.11.2021. godine.

3. Obrazloženje razloga nedovoljnog broja predmeta u radu tužilaštva ili pojedinih tužilaca;
4. Ostvareni rezultati u radu na predmetima ratnih zločina (procent realizacije plana za rješavanje predmeta ratnih zločina, broj riješenih prijava, broj riješenih istraga, broj podignutih optužnica, broj neriješenih prijava/istraga, itd.);
5. Ostvareni kvalitet rada tužilaštva shodno kriterijima za ocjenjivanje rada nosilaca pravosudne funkcije u tužilaštvu;
6. Rezultati rada u izvještajnom periodu u odnosu na prijave, istrage i optužnice:
 - a) prijave – broj neriješenih prijava iz ranijih godina, broj primljenih prijava u izvještajnom periodu, ukupan broj prijava u radu, broj prijava riješenih u izvještajnom periodu, broj neriješenih prijava na kraju izvještajnog perioda, obrazloženje povećanja/smanjenja broja neriješenih prijava u odnosu na prethodnu godinu;
 - b) istrage - broj neriješenih istraga iz ranijih godina, broj naređenih istraga u izvještajnom periodu, ukupan broj istraga u radu, broj istraga riješenih u izvještajnom periodu, broj neriješenih istraga na kraju izvještajnog perioda, obrazloženje povećanja/smanjenja broja neriješenih istraga u odnosu na prethodnu godinu;
 - c) optužnice – broj optužnica podignutih prije izvještajnog perioda, broj podignutih optužnica u izvještajnom periodu, ukupan broj podignutih optužnica, broj potvrđenih optužnica u izvještajnom periodu, broj optužnica čije je potvrđivanje odbijeno, broj optužnica za koje do kraja izvještajnog perioda nije donesena odluka o potvrđivanju, obrazloženje povećanja/smanjenja broja podignutih i potvrđenih optužnica.
7. Starost predmeta u fazi prijave (dužina rješavanja prijava, broj neriješenih prijava starijih od 1/2/3/4/5 godina, broj riješenih prijava starijih od 1/2/3/4/5 godina itd.);
8. Dužina trajanja istraga (dužina trajanja istraga, broj predmeta u kojima istraga traje duže od 6 mjeseci/1/2/3/4/5 godina, broj riješenih istraga u toku izvještajnog perioda koje su trajale duže od 6 mjeseci/1/2/3/4/5 godina itd.);
9. Ostvareni rezultati u radu na predmetima korupcije i organiziranog kriminala (broj riješenih prijava, broj riješenih istraga, broj podignutih optužnica, broj neriješenih prijava/istraga itd.);
10. Prosječno zaduženje svakog tužioca (prosječni broj zaduženih predmeta – prijava, te istraga - po tužiocu u izvještajnom periodu, broj tužilaca sa manjim ili većim zaduženjem od prosječnog u izvještajnom periodu);
11. Zastarjelost krivičnog gonjenja koja je nastupila iz subjektivnih ili objektivnih razloga, sa obrazloženjem povećanja odnosno smanjenja broja predmeta u kojima je donijeta tužilačka odluka o apsolutnoj ili relativnoj zastarjelosti;
12. Zaključna zapažanja o radu tužilaštva u izvještajnom periodu na osnovu prikazanih statističkih podataka i informacija navedenih u statističkom izvještaju;
13. Informacija o primjeni Smjernica za prevenciju seksualnog i rodno zasnovanog uznemiravanja u pravosudnim institucijama u BiH.

➤ **DRUGI DIO - Izvještaj o realizaciji strateških ciljeva predviđenih strateškim planom**

Izvještaj treba da obuhvati obrazloženja realizacije plana rada u izvještajnoj godini shodno članu 5. i 7. Uputstva za primjenu Pravilnika o orijentacionim mjerilima za rad tužilaca u tužilaštvima u BiH, po sledećim elementima:

1. Uvod – strateški ciljevi definirani Planom rada tužilaštva za narednu godinu
2. Pregled realizacije ciljanih rezultata iz strateškog okvira iskazan u skladu sa slijedećom tabelom:

Naziv strateškog cilja i ciljanog rezultata iz Strateškog okvira	Utvrđeni ciljani rezultati tužilačkog sistema / tužilaštva za tekuću godinu	Planirani ciljani rezultat tužilaštva za tekuću godinu	Realizovani ciljani rezultat tužilaštva za tekuću godinu ²	Izvršene mjere za realizaciju ciljanih rezultata

3. Pregled realizacije rizika i pretpostavki – svaki plan rada će u sebi da sadrži pretpostavke i rizike za svoju realizaciju, a u Izvještaju o realizaciji plana rada tužilaštva trebaju da izvijeste šta se promijenilo u odnosu na prethodno utvrđene pretpostavke i rizike i koji su efekti isti imali na realizaciju plana rada;
4. Opšta ocjena godišnje realizacije ciljanih rezultata iz strateškog okvira – na kraju, svako tužilaštvo treba dati opštu ocjenu godišnje realizacije ciljanih rezultata iz strateškog okvira, koja može, između ostalog, da uključi i prijedlog za doradu ili izmjenu ciljanih rezultata.
5. Preporuke za unapređenje efikasnosti rada tužilaštva

Smjernice za izradu godišnjeg izvještaja o radu tužilaštava primjenjivati će se za 2021. godinu i nadalje.

Broj: 06-09-4-4029-2/2021

Sarajevo, 10.11.2021. godine



Predsjednik VSTV BiH

Halil Lagumdžija

² Ukoliko dođe do ponavljanja rezultata iz prvog dijela izvještaja, nije potrebno ponovo upisivati podatke, nego preporučujemo da se referišete na tačku pod kojom su rezultati prikazani i detaljno objašnjeni u Izvještaju.

